

## REGIONAL NEWS BULLETIN

Date – 01/07/2024 Time - 18:30 -18:40Hrs

### HEADLINES (EVENING)

- Vawiin atanga hman tan tura sawrkar laipuiin Dan thar a siam, New Criminal Laws of India 2023 chu ram pumah hman tan a ni.
- Dan bawhchhia te hremna dan thar pathum vawiin atanga hman tan Bharatiya Nyaya Sanhita (BNS) hnuaiiah vawiin khan case hmasa ber Champai Police station ah ziah luh a ni.
- Vawiin Lok Sabha thutkhawmah President Draupadi Murmu-i thusawi chungchanga lawmthu sawina motion sawiho a ni
- National Testing Agency chuan vawiin khan NEET(UG) Re-Test neih hnua zirlai 1563 te result ennawn a ti chhuak



### CRIMINAL LAWS OF INDIA 2023

Vawiin atanga hman tan tura sawrkar laipuiin Dan thar a siam, New Criminal Laws of India 2023 chu ram pumah hman tan a ni ta.

He dan tharah hian IPC tih thin chu Bharatiya Nyaya Sanhita (BNS) 2023 tia thlak a ni a; CRPC chu Bharatiya Nagarik Suraksha Sanhita (BNSS) ni tawhin Indian Evidence Act ni thin pawh Bharatiya Sakshya Adhinyam (BSA) a ni tawh dawn a ni.

He Dan thar hman tur chungchangah hian Akashvani chuan Dan hre mite leh Dan zirna hmun, Govt. Aizawl Law College-a zirtirtute a kawm a. Anni chuan he Dan thara hmanga thil inthlak hrang hrang te an sawi a. Dan hman lai mek chuan tunlai thiamna leh hmasawn mekna a pha tawh lo nia sawiin, a thlakna tur Dan tharah chuan pawikhawihna thenkhat hremna tihsan a ni a, harsatna thenkhat thuneihnain a huam chin tichiengin Dan bung leh chang hman tlak tawh loh te paih a ni, an ti.

He Dan tharah hian hmeichhia leh naupang chungah pawikhawihntute hremna dah belh a ni a; Penal Code mi hrem theih nana hmasa ber atan Vantlang hna thawhtir a rawn dah thar a; a hmaa IPC ni thin nena danglamna lian zualah dan bawhchhiatna jail tan theihna chi 33 a awm belh a, heng bakah hian dan bawhchhiatna sum leh pawisa chawitir theihna chu 83-in a tam ta zawk a ni.

He dan thar hman tur chungchangah hian IGP Pu Lalbiakthanga Khiangte chuan dan thar tha tak tak hmang tangkai theitu chu mipuite an ni tih sawiin mipuite hamthatna atana dan siam anih ang ngeia hman tangkai a pawimawh a ti a, mipuiten ngaihven a pawimawh a ti bawk.

Sawrkar laipuiin dan thar July ni 1 atanga hman tura a duan 3 chungchang sawihona hi Akashvani chuan kar tin Inrinni tlai dar 4 atanga dar 4:30 chhungin a tichhuak thin a ni.



## CRIMINAL LAWS ENFORCED IN MIZORAM

Dan bawhchhia te hremna dan thar pathum vawiin atanga hman tan Bharatiya Nyaya Sanhita (BNS) hnuaiyah vawiin khan case hmasa ber Champhai Police station ah ziah luh a ni.

FIR ziah luh hi CCTNS hnuaiyah niin Indian Penal Code (IPC) ni thin Bharatiya Nyaya Sanhita (BNS) tia thlak tak hnuaiyah ziah luh a ni a, vawiin chawhma dar 10 leh chanve khan an ziah luh a ni.

He dan thar hman tur pual hian vawiin khan Mizoram hmun hrang hrangah hun hman a ni a,

He ni puala Serchhipa hun buatsaih chu Home Minister Pu K.Sapdanga chuan a hman pui a, dan thar chuan mipui mimir te thlavang na takin a hauh a, police te tha ti chakin sual hmeh mih nan sual lakah nasa takin a thikthu a tichhia a ti a, ram leh mipui tana dan tha tak a ni dawn tih a sawi.

Aizawla hun hmanah chuan DGP Anil Shukla chuan Sawrkar laipuiin dan thar a siam kengkawh turin Mizoram Police an inpeih fel tawh a ti a, he dan thar hmang thei tur hian hun rei tak inpuahchahna nasa takin kalpui a lo ni tawh tih sawiin Pawi khawitu te hremna chungchangah he dan thar hian danglamna nasa tak a thlen dawn tih a sawi.

DGP chuan Electronic FIR pawh hman tan a ni dawn a ti a, case chinfel hun bituk siam chuan nasa takin thil a ti awlsam dawn tih sawiin dan thar hman tur ah tunlai thiamna thar technology chu nasa takin sulhnu chhui na leh evidence atan hman tangkai a ni dawn tih a sawi baw.

Siaha ah chuan SP Pu K.L. Vulmawia chuan Criminal Laws thar kalpui tur chu mi tin te dikna chanvo min hriattirtu a ni a ti a, dan chu himna min petu zawk a ni tiin dan chungchangah mipuite thangharh a hun tawh hle a ni a ti baw.

Kolasib ah chuan District Jail-ah hemi pual hian hun hman ani a, Dan thar pathuma thil langsar leh pawimawh zual te sawifiah niin inzirtirna hun hman a ni.

Mamit ah chuan SP Conference Hall ah New Criminal laws tlangzarhna leh zirchianna hun hman a ni a, SP Pi Lalthangpuii Pulamte chuan dan hriatna chuan inrintawkna min neih tir tur ani tih sawiin mi tin tan dan siam chu zir chian a pawimawh tih a sawi.



## WEATHER ALERT

Khawchin hrilhlawktu State Meteorological Centre, Aizawl Director chuan Mizoramah ni 4 atanga ni 5 chhung ruah nasa taka sur thei a ni a ti.

State Meteorological Centre Director Pu Sudheer Kumar Dwivedi a'n Akashvani palai a hrilh danin tunkar chhungin Mizoram pumah ruah a tam dawn a ti a. A bik takin Aizawl, Kolasib district-ah ruah tam tak sur thei ani tih sawiin ruah hi Mamit, Lunglei leh Lawngtlai ah te sur thei ani a ti baw.

BYTE 12 SECS

Pu Sudheer Kumar Dwivedi chuan ruahsur tam bakah thli tleh thei anih avangin mipuite chu in lama awm tam tur leh fimkhur turin a chah bawk.

<><><>

#### CORRUPT CASE SENTENCED

Zirtawpni liam taa Aizawl Special Court (Prevention of Corruption)-in thiam loh a chantir tak, State Bank of India Mission Veng Branch Manager hlui, Lalkhomang Guite leh Aizawl Sacred Heart Society hotu Gary T. Haokip te hremna chu Special Court-in vawiin khan a puang a, kum 4 chhung Jail tang tur leh Cheng Nuai 10 ve ve chawi turin a hrem.

Court thuchhuah tarlan danin an pawisa chawi tur hi an pe thei lo a nih chuan kum 2 ve ve an tan belh dawn a, hremna a pek chhan tarlanah pawisa khawih chingpen zat a tam avang leh an dan bawhchhiat dan chu a danglam hle a, midang tan mai bakah anmahni insiam that nan a tul vang niin Court thuchhuah chuan a sawi.

Lalkhomang Guite, Churachandpur Manipur leh Gary T. Haokip, Aizawl Republic Mual Veng-te hi kum 2006 leh 2007 inkar chhunga a tak awm lo Self Help Group hminga Cheng vaibelchhe 2 leh Nuai 10 chuang loan pek chhuah kawngah Dan bawhchhiaa puh an ni a. CBI-in an chhui hnu-ah Special Judge Dr. HTC Lalrinchhana chuan Zirtawpni khan Dan hrang hrang tlawhchanin thiam loh a chantir a. Hemi ni vek hian Central Jail-ah thawn thlak an ni.

Self Help Group 20 hminga loan pek chhuah hi Lalkhomang Guite hian a pawmsak a, Self Help Group aiawha hming ziahte hi Gary T. Haokip kutziak vek a ni tih hmuhchhuah a ni bawk a. Hetianga pawl dinte hi Cheng Nuai 5 theuh loan pek chhuah an nih laiin an dawn tur zat hria an awm lova, a dawng tam pawlin Cheng Nuai khat an dawn laiin tam tak chuan Cheng 50,000 an dawng a. An dawn bang zawng leh Khadi and Village Industries Commission (KVIC)-in a lo do vena tur Cheng Nuai khat leh Sing 5 theuh an dawn tur pawh thiam loh chantir takte pahnih hian an insem vek niin CBI chuan an ngai a ni.

<><><>

#### PROJECT INTODELH

“Project Intodelh Inzirtirna” chu vawiin khan Education Minister Dr. Vanlalhlana'n a hawng a, he hmalakna kalpui tur hian Samagra Shiksha leh TEMC te'n thawhdunna thuthlung an ziak.

TiLi Entrepreneurship Mindset Curriculum (TEMC) leh Samagra Shiksha, Mizoram te chuuan Zirlai te mahni kut ke a ding thei tura kaihhraina tur atan leh hman tlak thiamna pe tura chher turin “Project Intodelh Inzirtina” kalpui turin an thawk dun dawn a, he huna khuallian, School Education Minister Dr Vanlalhlana chuan zirlaibu ah entrepreneurship chungchang telh chu a duhthusam leh ngaih pawimawh ber a lo ni tawh thin tih sawiin, vawiin hun ang an thleng chu ropui a tih thu a sawi a, mahni ke a ding thei tura thil siam chhuah leh hralh chhuh theih tur ngaihtuah a hun tawh thu leh zirna huang chhung ah kalpui a hun tawh thu a sawi a, High School ah chuan a taka kalpui a nih tawh thu leh tuna hmalakna thar tur chu zirlaite tan a chhenfakawm ngei a beisei tih a sawi bawk a ni.

Pu Lalsangliana, State Project Director Samagra Shiksha Project Director chuan kum 2024-2025 atan Project intodelh inzirtirna chu Samagra Siksha Mizoram

chuan school 10 ah kalpui in, zirlai thlan chhuah bik te hnenah he project hi kalpui a ni dawn tih a sawi a ni.

<><><>

## MZU VICE CHANCELLOR

Mizoram University Vice Chancellor Prof. Dibankar Chandra Deka chuan tunhnaia University tha tehnaa dinhmun tha taka an awm chu a thawhpuite thahnem ngaihna a ni a ti a, NIRF Ranking kumina lo awm turah hmasawna hmuh ngei a beisei tih a sawi.

Akashvani palai nen an inkawmna ah he thu hi sawiin MZU Vice Chancellor chuan Indian Institutional Ranking Framework (IIRF)-in India rama zirna in tha a thlanah central university zingah Mizoram University chu 15-na a ni a ti a, he dinhmun thleng tura thawktu zawng zawng te chungah lawmthu sawiin dinhmun sang tak an thlen theih nachhan chu zirtirtute thawhrimna vang a ni a ti bawk.

Vice Chancellor chuan tun hnaiah NAAC hnuiaia endikna tha takin an paltlang a ti a, Indian Institutional Ranking Framework (IIRF) chu Private Agency te buatsaih ni mahse a lawmawm hle tih sawiin kumina Ministry of Education in National Institutional Ranking Framework a tihchhuah turah hmasawna an hmuh ngei a beisei a ti bawk.

Mizoram University hi nikum khan NIRF ranking ah 76-na ah an awm a, hmarchhak state zingah Tezpur University 68-na chiah tluk loh an nei a ni.

<><><>

## PARLIAMENT

Vawiin Lok Sabha thutkhawmah President Draupadi Murmu-i thusawi chungchanga lawmthu sawina motion sawiho a ni a. House-a thutkhawm tan anih hian Leader opposition Leader Rahul Gandhi-a chuan NEET exam thil diklo awm chungchanga puhna chu sawiho a phut a. Parliament atangin rampumah NEET chungchanga thuchah neih a duh thu a sawi a. An thil phut tihhlawhtlin anih loh avangin Opposition memberte hi lungawiloin house atangin an chhuak a ni.

BJP MP Anurag Thakur-a chuan thusawiin Prime Minister Narendra Modia kaihhruaina hnuiaia kum 10 chhunga sawrkar hmalakna hrang hrangte a fak a. Mipuite hamthatna tur leh ram a hmasawna turin sawrkarin kawng tinrengin hma a la a ni a ti.

Rajya Sabha ah pawh Opposition memberten NEET Exam chungchanga adjournment notice an dil chu Chairman Jagdeep Dhankar chuan a phalsak lo a. Hemi hnu hian President thusawia lawmthu sawina motion sawiho a ni a. Opposition Leader Mallikarjun KHarge chuan President thusawi khan hmathlir leh tum ram kawh tum a nei lo a ti a. Mi rethei, SC leh hnam tlem zawkte tan engmah thatna tur a tarlang lo niin a sawi a. Heng bakah hian Pu Kharge-a chuan exam zawhna putru te, rel chesualte, J&K-a firfiakte chetna leh thil thleng langsar tak takte a sawi chhuak a ni.

<><><>

## NTA RETEST

National Testing Agency chuan vawiin khan NEET(UG) Re-Test neih hnu zirlai 1563 te result ennawn a ti chhuak a. Hei bakah hian NTA chuan result thar a

chhuah rual hian candidate te tihthat dan indawt rank a siam pawh a ti danglam nghal a. NTA chuan zirlai te score card hi an website ah en theiha dah anih thu sawiin test nawn lehnaa tel zirlai 813 te te result pawh dah a ni a ti. Puan tawh angin NTA-in NEET-UG test nawn leh tur hian zirlai 1563 te hun a pe leh a. Heng zingah hian 813 te chu thla hmasa ni 23 Supreme Court thupek angin retest neih tir an ni.

